

**YSGOL GYNRADD BONTNEWYDD
LLAWLYFR - HANDBOOK
2015 – 2016**



**Bontnewydd
Caernarfon
Gwynedd
LL55 2UF**

Ffôn / Tel. – 01286 673880

E-bost / E-mail – JanetWynGeorge@gwynedd.gov.uk

**PENNAETH / HEADTEACHER
Mrs. Janet Wyn George B.A**

**Cadeirydd y Llywodraethwyr / *Chair of Governors*
Mr. Siôn Jones**

**Ysgol Gynradd Sirol Ddwyieithog ar gyfer disgyblion 3-11 oed
*County Primary bilingual school for pupils aged 3-11 years old***



Ysgol Gynradd Bontnewydd

Bontnewydd

Caernarfon

Gwynedd

LL55 2UF

☎ 01286 673880

JanetWynGeorge@gwynedd.gov.uk



Pennaeth/Headteacher: Janet Wyn George

Annwyl Riant,

Croeso i Ysgol Bontnewydd.

Hoffwn estyn croeso cynnes i chi a'ch plentyn i Ysgol Bontnewydd. Pwysleisiwn, fel staff a Llywodraethwyr, mai partneriaeth yw addysg rhyngom ni yma a chwithau yn y cartref. Trwy gydweithio hyderwn y bydd cyfnod eich plentyn gyda ni yn un hapus ac y bydd yn datblygu yn addysgol a chymdeithasol i'w lawn botensial.

Ymfalchiwn yn y berthynas agos sydd gennym fel ysgol gyda'n rhieni ac edrychwn ymlaen at groesawu a chyd-weithio gyda chi.

Gobeithiwn y bydd y llawlyfr yma o gymorth i chi ddod i adnabod yr ysgol a'r modd y gallwch chi atgyfnerthu ein gwaith gyda'ch plentyn. Cyflwynir manylion am nifer o faterion sydd o bwys i gynorthwyo trefniadaeth yr ysgol ac i helpu'r plentyn i ymgartrefu'n fuan. Am ragor o wybodaeth gallwch gyrchu i wefan yr ysgol ar <http://ysgolbontnewydd.org/>

Fe'ch gwahoddir i drafod cynnwys y llawlyfr neu unrhyw fater arall gyda mi trwy wneud trefniadau i ymweld â'r ysgol.

Yn gywir iawn

Janet Wyn George

Janet Wyn George
Pennaeth

Gwybodaeth Gyffredinol

Mae Ysgol Bontnewydd yn gwasanaethu pentref Bontnewydd a'r cylch gwledig cyfagos, gan gynnwys pentrefi Caeathro a Llanfaglan. Ceir disgyblion hefyd sydd yn teithio o'r tu allan i ddalgylch naturiol yr ysgol.

Mae'r ysgol yn gwasanaethu cymuned eang ag iddi amrywiaeth ieithyddol a chymdeithasol. Gwneir y gorau bob amser i sicrhau bod pob disgybl yn teimlo'n rhan o deulu'r ysgol.



Agorwyd yr ysgol bresennol yn 1976, ond mae addysg wedi ei ddarparu ar y safle ers canrif a mwy. Gwneir defnydd ysbeidiol o'r Hen Ysgol o hyd, ac yma y lleolir yr Ysgol Feithrin a'r Clwb Ôl Ysgol.

Mae'r adeilad presennol wedi ei chynllunio fel un rhannol agored a cheir wyth o ddsbarthiadau pwrpasol yn ogystal â neuadd, tir caled a thir gwyrdd eang. Agorwyd Uned Gwryfai yn 2000, sef uned lloeren Ysgol Pendalar ac Uned Therapi yn 2009.

Cafodd yr ysgol ei harolygu gan Estyn yn Rhagfyr 2009. Derbyniwyd Adroddiad rhagorol ym mhob un o'r meysydd arolygu. Gellir cael copi o'r Adroddiad o'r ysgol neu o wefan yr ysgol. www.ysgolbontnewydd.org

Ymfalchiwn yn y ffaith bod rhieni ac ymwelwyr â'r ysgol yn cydnabod yr ymdeimlad o gyfeillgarwch a threfn sy'n bodoli yma, a'r modd y bydd disgyblion newydd yn ymgartrefu'n hapus.

Ceir awyrgylch symbylus a gweithgar yn y dosbarthiadau yn seiliedig ar gydberthynas o barch a gofal. Mae hyn yn galluogi'r disgyblion i ddatblygu hunan hyder ag agwedd bositif at ddysgu. Disgwylir safon uchel o ymddygiad ac ymroddiad ar bob achlysur. Ceir ymdeimlad da o gydweithio ac anogir pob disgybl i dderbyn a rhannu cyfrifoldebau amrywiol.

"Mae ethos gofalgar a chynhwysol yn yr ysgol ac mae'r disgyblion yn cael eu gwerthfawrogi a'u cefnogi gan yr oedolion oll". ESTYN



NODAU AC AMCANION

NODAU

1. Creu amgylchfyd ac awyrgylch lle gall y disgybl dyfu, datblygu ac aeddfedu i ddod yn unigolyn hyderus, yn ymwybodol o les eraill, ac yn aelod cyfrifol o'r gymdeithas.
2. Cynnig addysg o'r ansawdd uchaf posibl sydd yn adlewyrchu gofynion yr Awdurdod, y gymdeithas a'r unigolyn.
3. Galluogi pob disgybl i ddatblygu i fod yn rhugl yn y Gymraeg a'r Saesneg fel y gallent gymryd rhan lawn ym mywyd cymdeithasol a diwylliannol y gymdeithas ddwyieithog.

AMCANION

1. Galluogi pob plentyn i ddatblygu ei botensial yn llawn drwy ennill sgiliau, gwybodaeth, dealltwriaeth ac agweddau, gan gynnwys sgiliau personol, cymdeithasol ac emosiynol, i'w alluogi i ddod yn ddinesydd dwyieithog sy'n weithredol yn economaidd, yn gymdeithasol ac yn bersonol, ac yn ddysgwr gydol oes.
2. Galluogi pob plentyn i fod yn ddwyieuthog
3. Cynnig i blant gwricwlwm cynhwysol sy'n eu hysgogi i ddysgu ac i wireddu eu potensial
4. Sefydlu cymuned ddysgu broffesiynol cadarn lle gall ymarferwyr ddatblygu a rhannu gwybodaeth broffesiynol am ddysgu ac addysgu
5. Hyrwyddo diwylliant o gynhwysiant cymdeithasol a pharch at amrywiaeth, yn arbennig drwy ddatblygu lles plant a theilwra'r dysgu i'r unigolyn.
6. Darparu cymuned ddysgu ar gyfer pawb sy'n gysylltiedig â bywyd ysgol, yn cynnwys plant a'u teuluoedd, llywodraethwyr, athrawon, staff arall yn yr ysgol ac oedolion sy'n hyfforddi i weithio yn yr ysgol.
7. Bod yn chwaraewr allweddol gyda darparwyr gwasanaethau eraill wrth gynllunio a chyflwyno gwasanaethau gwell i'r plant er mwyn gwella'u lles.

STAFF YR YSGOL

STAFF DYSGU

Pennaeth

Mrs Janet Wyn George

Dirprwy Bennaeth

Miss Eirian Madine

Athrawon Cyfnod Allweddol 2

Athrawes Wyddfa
 Elidir
 Tryfan
 CPA (Rhan Amser)

Miss Siân Pritchard
Miss Eirian Madine
Mrs Rona Hughes
Mrs Susan Williams

(Bydd dosbarthiadau C.A.2 yn cyfuno i dri dosbarth: Bl.3/4 (Tryfan); Bl 4/5 (Elidir); Bl 5/6 (Wyddfa))

Athrawon Cyfnod Sylfaen

Athrawes Dosbarth Meithrin/ Derbyn
 Blwyddyn 1
 Blwyddyn 2
 CPA (Rhan Amser)

Mrs Mair Hughes Jones
Miss Rachel Wills
Mrs Rowena Robert-Evans
Mrs Bethan Jacks

**(Bydd dosbarthiadau'r CS yn cyfuno i ddau ddosbarth yn y prynhawniau:
Bl D/1; Bl. 2**

Cymorthyddion Cyfnod Sylfaen

Mrs Beth Green
Mrs Iona Robinson
Mrs Gillian Jones
Miss Glesni Williams
Miss Gillian Evans

Cymorthyddion Anghenion Arbennig

Miss Ceri Jones
Mrs Dawn Owen
Miss Ceridwen Fox
Mrs Christine Jones
Mrs Rhian Hall
Mrs Lliwen Morgan
Miss Sioned Evans
Miss Emma Williams
Miss Sara Nierada
Mrs Carys Cadwaladr

Athrawon Teithiol Cerdd

Telyn
Pres

Mrs Alwena Roberts
Mr Dylan Williams

STAFF ATEGOL

Ysgrifenyddes

**Clerc Cinio / Gweinyddes Lleihau Baich
Clerc Cyllidol**

Mrs Amanda Farrer
Mrs Gillian Jones
Mrs Beth Green

**Gofalwr/Glanhawr
Glanhawraig**

Mr Glyn Brown
Mrs Lilia Owen

Cogyddes

Cynorthwywyr Cegin

Mrs Magi Johnson
Mrs Carolyn Summers
Mrs Lilia Owen
Mrs. Sarah Childes

**Uwch Oruchwyliwr Canol Dydd
Goruchwyliwr Canol Dydd**

Mrs Gillian Jones
Mrs Carys Porter
Mrs Christine Jones

**Uwch Oruchwyliwr Clwb Brecwast
Goruchwyliwr Clwb Brecwast**

Mrs Carys Porter
Mrs Carys Porter
Mrs Christine Jones
Mrs Rhian Hall
Mrs Lilia Owen

LLYWODRAETHWYR

Mae Ysgol Bontnewydd yn ffodus iawn i gael Corff Llywodraethol ymrwymedig a gweithgar.

Y Corff Llywodraethol o Fedi 2014

<u>Aelodau</u>	<u>Penodwyd gan</u>	<u>Tymor yn diweddu</u>
Mr. Sion Jones	Cynrychiolydd Rhieni	31/8/2016
Mr. Huw Ceiriog	Cynrychiolydd Rhieni	31/8/2016
Mrs. Meilys Smith	Cynrychiolydd Rhieni	31/8/2016
Mr. Gethin Thomas	Cynrychiolydd Rhieni	31/8/2018
Mrs. Ceri Ann Evans	Cynrychiolydd A.A.LL	31/8/2018
Mrs Rebecca Humphreys	Cynrychiolydd A.A.LL	31/8/2017
Mr. Chris Hughes	Cynrychiolydd A.A.LL	31/8/2016
Mr. Dewi Euron Griffiths	Cyfetholedig	31/8/2018
Mr. Dewi Ellis Davies	Cyfetholedig	31/8/2018
Mr. Gruffudd Williams	Cyfetholedig	31/8/2016
Mr. Rhys Pugh	Cynrychiolydd Cyngor Cymuned	31/8/2017
Miss. Ceri Ann Jones	Cynrychiolydd Staff Ategol	31/8/2018
Miss Eirian Madine	Cynrychiolydd Athrawon	31/8/2017
Mrs. Janet George	Pennaeth	
Mrs. Amanda Farrer	Clerc y Llywodraethwyr	

Os ydych angen trafod unrhyw fater gyda'r Corff Llywodraethol yna cysylltwch â'r Cadeirydd neu'r Clerc.

Cadeirydd: Mr. Siôn Jones,
Pontwyled,
Llanwnda,
Caermarfon

Clerc: Amanda Farrer
Rhiw,
Ffordd Bangor,
Caernarfon,
AmandaFarrer@gwynedd.gov.uk

POLISI MYNEDIAD

Derbynnir disgyblion i'r ysgol yn unol â Pholisi Mynediad yr Awdurdod. Gellir gweld copi trwy gyrchu i wefan Cyngor Gwynedd.

Yn unol â'r polisi hwnnw, derbynnir disgyblion Meithrin (rhan amser), i'r ysgol yn y mis Medi yn dilyn eu pen-blwydd yn 3 oed.

Derbynnir disgyblion oed Derbyn i'r ysgol yn llawn amser yn y Medi yn dilyn eu pen-blwydd yn 4 oed.

Croeso i chi gysylltu â'r Pennaeth i drafod a threfnu ymweliad cyn gwneud cais i'r Awdurdod.

Yn yr un modd, dilynnir Polisi Mynediad yr Awdurdod i drosglwyddo disgyblion hŷn o un ysgol i'r llall. Mae'n arferol i ddisgyblion sy'n trosglwyddo i Gyfnod Allweddol 2 a hynny heb eu bod yn medru'r Gymraeg i fynychu'r Uned Iaith ym Maesincla am dymor.

POLISI IAITH

Amcanion Cyffredinol

- Meithrin agwedd gadarnhaol tuag at y ddwy iaith
- Datblygu gallu ieithyddol yn y ddwy iaith
- Meithrin diddordeb mewn ffurfiau amrywiol o lenyddiaeth
- Creu ymwybyddiaeth o werth yr etifeddiaeth Gymraeg

Prif Amcanion

Prif amcanion gweithgareddau'r Cyfnod Sylfaen fydd rhoi sylfaen gadarn Gymraeg i bob plentyn. Gan mai yn y cyfnod cynnar hwn y mae plentyn mwyaf parod i amsugno iaith, y mae'n bwysig creu amrywiaeth o brofiadau symbylus iddynt.

Ym mlwyddyn 1 a 2 adeiladir ar y sylfeini a osodwyd i'r Gymraeg, er mwyn galluogi'r plentyn i gyrraedd y nod o ddwyieithrwydd llawn maes o law; cadarnhau a datblygu mamiaith y plentyn o ddysgwyr Cymraeg ac ymestyn gafael y plant o gartref Cymraeg ar y Saesneg.

Yng Nghyfnod Allweddol 2 bydd cadarnhad a datblygiad pellach o Gymraeg a Saesneg pob plentyn, er mwyn sicrhau ei fod yn gallu siarad, darllen ac ysgrifennu'n rhwydd a hyderus yn y ddwy iaith pan fydd yn trosglwyddo i'r ysgol Uwchradd.

Trefnir i hwyrddyfodiaid yn Cyfnod Allweddol 2 i fynychu'r Uned Iaith Dalgylchol ble mae cyfleusterau ar gyfer cyflwyno cyrsiau dwys arbenigol i ddysgwyr. Bydd y dysgwyr yn trosglwyddo yn ôl i'r ysgol gynradd ymhen tymor.

I hybu naws Gymreig yr ysgol, disgwylir mai'r Gymraeg a ddefnyddir i sgwrsio'n anffurfiol yn y dosbarth ac ar y buarth. Annogir hyn gan Gyngor y Siarter Iaith.

Croeso i chi gysylltu â'r Pennaeth i weld copi o'r Polisiau Iaith

Y CWRICWLWM

Ein nod yn Ysgol Bontnewydd yw darparu addysg gyflawn a chwricwlwm eang i bob disgybl. Hyderwn ein bod yn galluogi pob plentyn i ddatblygu i'w lawn botensial.

Creiddiol i'n gwaith yw sicrhau fod pob plentyn yn datblygu'r sgiliau angenrheidiol ar gyfer dysgu gydol oes, ac i fod yn aelod llawn o'r gymdeithas. Rhoddwn fri mawr ar sicrhau sgiliau dwyieithog pob plentyn gan gynnwys gwybodaeth a dealltwriaeth o'r etfeddiaeth Gymraeg.

Y CYFNOD SYLFAEN

Dilynir saith maes cwricwlwm y Cyfnod Sylfaen gyda'r disgyblion rhwng 3 i 7 oed.

- Datblygiad Personol a Chymdeithasol, Lles ac Amrywiaeth Ddiwylliannol
- Sgiliau Iaith, Llythrennedd a Chyfathrebu
- Datblygu'r Gymraeg
- Datblygiad Mathemategol
- Gwybodaeth a Dealltwriaeth o'r Byd
- Datblygiad Corfforol
- Datblygiad Creadigol

CYFNOD ALLWEDDOL2

Dilynir Cwricwlwm Cenedlaethol 2008 gyda disgyblion 7-11 oed.

- Pynciau Craidd – Cymraeg, Saesneg, Mathemateg a Gwyddoniaeth
- Pynciau Sylfaen – Hanes, Daearyddiaeth, Addysg Grefyddol, Cerdd, Celf, Technoleg Gwybodaeth, Dylunio a Thechnoleg ac Addysg Gorfforol

Yn naill gyfnod allweddol dilynir gofynion y Fframwaith Llythrennedd a Rhifedd yn ogystal a'r Fframwaith ar gyfer Addysg Personol a Chymdeithasol

“Darpara'r ysgol amrediad cyfoethog ac ysgogol o brofiadau dysgu. Mae hyn yn nodwedd ragorol yn y ddarpariaeth” ESTYN

Bydd rhai disgyblion ADY yn cael eu tynnu o'r dosbarth ar adegau i weithio ar eu targedau personol.

TREFN DIWRNOD

CYRRAEDD YR YSGOL

Mae'r ysgol yn derbyn cyfrifoldeb am y plant am 10 munud cyn ac ar ôl pob sesiwn dysgu. Atgoffwn y rhieni yn rheolaidd nad oes gan athrawon gyfrifoldeb am y plant yn swyddogol tan 8:50 a.m. ac na ddylai plant gyrraedd yr ysgol cyn hynny.

Cynhelir Clwb Brecwast yn Ysgol Bontnewydd. Mae'n glwb rhad ag am ddim i bob plentyn o oed ysgol. Bydd y Clwb ar agor rhwng 8:00 a 8:50. Bydd brecwast yn cael ei weini rhwng 8:00 a 8:30. Bydd staff y Clwb Brecwast yn goruchwyllo aelodau'r Clwb o 8:00 tan 8:50.

GADAEL YR YSGOL

Dylai'r rhieni ddod i gyfarfod y plant at giât yr ysgol a bydd yr athrawon yn eu danfon yn ddiogel. Os digwydd i riant fod yn hwyr yn dod i nôl plentyn, bydd yr athrawes yn mynd ag ef yn ôl yn ddiogel i'r dosbarth. Gofynnir i rieni sy'n hwyr ddod i mewn i'w nôl.

Yn naturiol, nid oes hawl gan blentyn o'r Cyfnod Sylfaen i adael tir yr ysgol heb ganiatâd a heb oedolyn i'w gyrchu. Cofiwch roi gwybodaeth i ni yn yr ysgol, yn ogystal ag i'ch plentyn, os bydd unrhyw newid yn y trefniadau arferol ar gyfer codi plant o'r ysgol. Pan fydd teuluoedd yn chwalu, ac un o'r rhieni'n cael gofal dros y plant, mae'n bwysig ein bod yn cael gwybod am y trefniadau er mwyn osgoi sefyllfa annifyr.

Ni ellir gadael i blentyn fynd o'r ysgol yn gynnar oni bai fod rhiant yn dod i'w nôl neu fod cais ysgrifenedig yn cael ei dderbyn yn gofyn i ni anfon y plentyn adref ar amser penodol.

Daw diwedd i ddiwrnod ysgol yn y Cyfnod Sylfaen am 3:00 ac am 3:20 yn Cyfnod Allweddol 2.

CINIO YSGOL

Anogir pob disgybl i gymryd prydau ysgol ar ddechrau'r dosbarth Derbyn. Mae'r bwyd a ddarperir yn arlwy cytbwys ac iach. Os oes gan eich plentyn alergedd at fathau gwahanol o fwyd dylid cynnwys y wybodaeth ar ffurflen fynediad eich plentyn neu drwy gysylltu â'r Pennaeth. Bydd y wybodaeth yn cael ei drosglwyddo i'r gogyddes. Mae'r plant i gyd yn bwyta o dan arolygaeth yn y neuadd.



Gofynnwn i chi gadw at yr un drefn am yr wythnos. Cesglir arian cinio ar fore dydd Llun a bore dydd Gwener. Ar hyn o bryd pris cinio ysgol yw £2.05 sef £10.25 yr wythnos. Gofynnir yn garedig i chi dalu yn brydlon. Y Clerc Cinio ar gyfer unrhyw ymholiadau tâl yw Mrs Gillian Jones. Rhoddir cynnig i ddisgyblion sy'n dod a phhecyn bwyd i ymuno gyda'r criw cinio ysgol ar ddyddiau arbennig megis Cinio Nadolig, Cinio Gŵyl Ddewi a Chinio Rhyngwladol.

Anogir plant i ddod a ffrwyth i'w fwyta ar amser egwyl. Darperir dŵr yfed ym mhob adran ond croeso i'r plant ddod a photeli dŵr hefyd.

BOCSYS BWYD

Os nad ydych am i'ch plentyn gael cinio ysgol, gall ddod a phhecyn bwyd i'r ysgol. Mae'r plant i gyd yn bwyta o dan arolygaeth yn y neuadd. Ceisiwch sicrhau bod cynnwys y bocs yn cydymffurfio i'n polisi Ysgol Iach h.y. dim diod siol, dim da-da, dim llawer o bethau melys.



PRESENOLDEB

Mae presenoldeb a phrydlondeb disgyblion yn un o brif flaenoriaethau'r ysgol. Cydnabyddir fod cydberthynas rhwng presenoldeb a pherfformiad addysgol. O ganlyniad, anogir rhieni i sicrhau presenoldeb eu plant yn yr ysgol.

Mae cyfrifoldeb rhieni yn ymestyn i sicrhau fod eu plant yn cyrraedd yr ysgol mewn pryd, yn daclus, ac mewn cyflwr i ddysgu.

Bydd drysau'r Cyfnod Sylfaen a Chyfnod Allweddol 2 yn cael eu cau am 9:00. Disgwylir i ddisgyblion sydd yn hwyr cael mynediad drwy'r brif fynedfa.

YSTADEGAU PRESENOLDEB 2013-14

Presenoldeb	95.06%
Absenoldebau Awdurdodedig	4.53%
Absenoldebau Anawdurdodedig	0.42%

ABSENOLDEB

Mae presenoldeb a phrydlondeb disgyblion yn un o brif flaenoriaethau'r ysgol. Cydnabyddir fod cydberthynas rhwng presenoldeb a pherfformiad addysgol. O ganlyniad, anogir rhieni i sicrhau presenoldeb eu plant yn yr ysgol. Mae cyfrifoldeb rhieni yn ymestyn i sicrhau fod eu plant yn cyrraedd yr ysgol mewn pryd, yn daclus, ac mewn cyflwr i ddysgu.

Disgwylir i rieni egluro unrhyw absenoldeb, naill a'i ar lafar i'r athro dosbarth, dros ffon (01286 673880), drwy lythyr neu e bost i swyddfa'r ysgol ar **AmandaFarrer@gwynedd.gov.uk**

Er mwyn sicrhau diogelwch plant gofynnir i chi gysylltu â'r ysgol ar ddiwrnod cyntaf yr absenoldeb cyn 9:30.

Pan mae presenoldeb afreolaidd disgybl yn achosi pryder gofynnir am gymorth Swyddogion Lles Addysg.

Rhydd Corff Llywodraethol Ysgol Bontnewydd ganiatâd i rieni dynnu eu plant o'r ysgol i fynd ar wyliau hyd at gyfnod o 10 diwrnod mewn blwyddyn. **Cyn** trefnu gwyliau yn ystod wythnos ysgol dylai rhieni gael caniatâd y Pennaeth. Gall y polisi hwn newid ar fyr rybydd i gyd-fynd a rheolau statudol y Llywodraeth. Gofynnir i rieni blwyddyn 2-6 sicrhau presenoldeb eu plant yn ystod cyfnod y Profion Cenedlaethol (mis Mai).

CYFLE CYFARTAL, CYNHWYSIAD A CHYDRADDOLDEB

Nod yr ysgol yw:

- Sicrhau'r un cyfleoedd i'r holl ddisgyblion o ba bynnag gefndir cymdeithasol y dânt, cyfleoedd cyfartal i fechgyn a merched, i blant galluog iawn a phlant llai galluog.
- Meithrin agweddau cadarnhaol mewn perthynas â hil a chrefydd a rhyw.
- Osgoi cyflyru ac ystrydebu, yn enwedig mewn perthynas â'r cwricwlwm.

Mae gan yr ysgol ystod o bolisïau sy'n ymwneud â hyrwyddo cynhwysiad gwahanol ddisgyblion.

Croeso i weld copi o unrhyw un o'r polisïau hyn drwy gysylltu â'r Pennaeth. Mae'r Polisi Hygyrchedd yn cyfeirio at y trefniadau i hwyluso mynediad i ddisgyblion ag anabledd. Gwneir pob ymdrech i sicrhau nad ydynt yn cael eu trin yn llai ffafriol na disgyblion eraill. Sicrheir cefnogaeth fugeiliol ac academaidd gydradd i ddisgyblion ag anableddau o fewn fframwaith arferol yr ysgol.

Mae mynedfeydd priodol i dderbyn disgyblion, rhieni neu ymwelwyr ag anableddau drwy fynedfeydd yr ysgol ac Uned Gwryfai. Mae toiled addas i'r anabl o fewn yr adeilad. Mae mannau parcio dynodedig ar gyfer yr anabl yn y maes parcio. Mae Uned Therapi ar safle'r ysgol ar gyfer diwallu anghenion disgyblion ag anableddau corfforol o fewn prif ffrwd yr ysgol.

Yn yr un modd, sicrheir yr un cyfleoedd i ddisgyblion sydd mewn gofal. Bydd Cynllun Plentyn mewn Gofal yn cael ei lunio o fewn 20 diwrnod i dderbyn y plentyn yn yr ysgol ac yn cael ei adolygu bob chew mis. Y Cyd-lynydd ADY, Mrs Janet George yw'r aelod o staff sy'n gyfrifol am blant mewn gofal.

ANGHENION DYSGU YCHWANEGOL

Nodir mewn canllawiau cenedlaethol bod un disgybl ym mhob pump a chanddo Anghenion Addysgol Arbennig yn ystod ei yrfa yn y gyfundrefn addysg. Yn y cyd-destun yma mae'r ysgol yn arddel Polisi Anghenion Arbennig sydd yn seiliedig ar ofynion deddfwriaethol a Chanllawiau Gweithredu Awdurdod Addysg Gwynedd. Y Pennaeth sydd a'r cyfrifoldeb terfynol dros y polisi a Mrs Janet George yw Cyd - lynydd Addysg Ychwanegol yr ysgol.

Rhoddir plant y mae ganddynt anghenion arbennig ar Gofrestr Anghenion Addysgol Arbennig yr ysgol. Yn ôl dwyster eu hangen fe roddir disgyblion ar ystod o gamau. Bydd y ddarpariaeth wahanol a wneir ar eu cyfer yn amrywio o gymorth yn y dosbarth, cymorth unigol neu grŵp bach tu allan i'r dosbarth, cyngor gan y Seicolegydd Addysg, cymorth arbenigol a ddarperir gan yr Awdurdod Addysg yn yr ysgol neu leoliad mewn uned oddi ar safle'r ysol. Bydd pob darpariaeth a wneir yn cael ei drafod a'i gytuno gyda rhieni cyn ei weithredu.

Ein nod fel ysgol fydd cynnig arweiniad a darpariaeth a fydd yn gweddu i anghenion eich plentyn trwy gydol ei yrfa yn yr ysgol. Os bydd unrhyw bryderon gennych ynglŷn â datblygiad eich plentyn neu weinyddiad y Polisi Anghenion Arbennig fe'ch anogir i gysylltu yn gyntaf ag athro / athrawes eich plentyn, Y Cyd-lynydd Anghenion Arbennig neu gyda'r Pennaeth.

Croeso i chi gysylltu â'r Pennaeth i weld copi o'r Polisi ADY.

AMDDIFFYN PLANT

Mae'r ysgol hon yn gweithredu gofynion statudol mewn perthynas ag Amddiffyn Plant. Swyddog Dynodedig Amddiffyn Plant yw Janet Wyn George. Llywodraethwr Dynodedig Amddiffyn Plant yw Ceri Ann Evans. Bydd yr ysgol yn cyfeirio achosion at Wasanaethau Cymdeithasol/Heddlu lle'n briodol, ac yn unol a'r polisi Amddiffyn Plant.

UNED GWYRFAI

Agorwyd uned newydd arloesol ar safle Ysgol Bontnewydd yn Ionawr 2000. Roedd Uned Gwyrfai yn un o'r unedau cyntaf o'i fath yng Nghymru lle mae plant ag anghenion addysgol dwys yn cael eu haddysgu yn yr ysgol gynradd leol.

Partneriaeth rhwng Cyngor Gwynedd, Ysgol Pendalar ac Ysgol Bontnewydd yw Uned Gwyrfai. Caiff rhwng 6 – 8 disgybl oedran cynradd 7 -11 eu haddysg yno, o dan ofalaeth athrawes a chymorthyddion o Ysgol Pendalar. Gweithredir ar system o integreiddio rhwng yr Uned a'r prif lif i gyfoethogi profiadau addysgol a chymdeithasol disgyblion

CYNNAL YMDDYGIAD DA A DISGYBLAETH

Disgwylir i'r plant ymddwyn yn barchus a chwrtais bob amser. Mae gan yr ysgol Bolisi ar Hyrwyddo Ymddygiad Da a Disgyblaeth sydd ar gael yn yr ysgol i unrhyw un ei weld.

Mae disgwyl i bob disgybl gyfrannu at greu cymdeithas wâr yn yr ysgol drwy:

- Fod yn feddylgar, yn garedig ac yn foneddigaidd yn ei berthynas â disgyblion eraill, holl staff yr ysgol ac unrhyw ymwelwyr.
- Peidio â gwneud difrod bwriadol nac ymyrryd ag eiddo pobl eraill; peidio defnyddio iaith anwedus na bod yn anghwrtais ac ateb yn ôl.
- Gwneud pob ymdrech i gadw'r ysgol a'i hamgylchedd yn daclus gan roi pob ysbwriel yn y biniau.
- Peidio â dod â phethau personol i'r ysgol e.e., teganau oni ofynnir amdanynt gan yr athro/athrawes dosbarth

Mae'r drefn disgyblu yn seiliedig ar bolisi o ganmol a chlodfori'r ymddygiad a ddymunir. Mae pob athro/athrawes yn gyfrifol am ymddygiad ei ddosbarth ei hun, ond os oes angen, gellir cyfeirio disgybl i sylw'r Dirprwy neu'r Pennaeth. Mewn rhai achosion o gamymddwyn, cedwir y plentyn i mewn fel cosb dros amser chwarae. Os bydd sefyllfa yn codi ble bydd plentyn yn camymddwyn yn rheoliad neu'n ddifrifol, gofynnir i'r rhieni i ddod i mewn i'r ysgol i drafod y mater gyda'r Pennaeth. Mae'r ysgol yn hyrwyddo egwyddorion cynnal ymddygiad da Webster Stratton.

Mae'r ysgol yn ceisio dysgu'r disgyblion i wahaniaethu rhwng ffraeo dydd i ddydd rhwng ffrindiau a chyfoedion, a bwlio. Mae bwlio yn weithred fwriadol a bygythiol sy'n gamddefnydd o bŵer.

Ni ddioddefir unrhyw fath o fwlio yn yr ysgol. Mae canllawiau wedi'u nodi yn y Polisi Disgyblaeth ac os bydd bwlio'n digwydd yna delir â'r mater yn unol â'r canllawiau hynny.

Mae gan yr ysgol Bolisi Grym Rhesymol sydd i'w weithredu gan staff dan amgylchiadau arbennig er cynnal lefel dderbyniol o ddiogelwch.

DIOGELWCH

Mae system ddiogelwch yn bodoli yn yr ysgol hon. Ni fydd modd cael mynediad i'r ysgol drwy fynedfa'r Cyfnod Sylfaen/Adran Iau wedi naw o'r gloch. Gofynnir i rieni ganu cloch y brif fynedfa, os ydych am fynediad i'r ysgol.

Cymerir pob cam rhesymol ac ymarferol i sicrhau diogelwch a lles yr holl bersonau sy'n defnyddio adeiladau a thiroedd yr ysgol. Gweithredir yn unol â pholisi iechyd a diogelwch ac adolygir y gweithdrefnau yn rheolaidd. Rhaid i bob ymwelydd / gweithiwr lofnodi mewn wrth gael mynediad i'r ysgol gan dynnu sylw ei hun at reolau tan a rheolau diogelwch yr ysgol

Pe bai raid cau'r ysgol mewn argyfwng byddai'r staff yn gwneud eu gorau i gysylltu â chi yn uniongyrchol. Mae'n hollbwysig felly eich bod yn rhoi gwybod i'r ysgol pe bai eich manylion cyswllt megis rhif ffôn yn newid.

Mewn argyfwng megis tan, y man ymgynnull argyfwng yw'r Ganolfan Bentref.

Pe bai raid cau'r ysgol oherwydd tywydd garw gofynnir i chi gadw golwg ar wefan yr ysgol neu wefan Cyngor Gwynedd neu trwy wrando ar bigion newyddion Radio Cymru neu Heart.

GORUCHWYLIO

Ein nod yw sicrhau diogelwch y plant a chadw safon dderbyniol o drefn a rheolaeth.

Mae'r ysgol yn gweithredu trefniadau goruchwyllo plant gan yr athrawon a'r gweinyddesau yn ystod y cyfnodau isod:

- Cyn dechrau'r ysgol (8.50 – 9.00)
- Egwyl y bore
- Egwyl y prynhawn
- Diwedd y prynhawn (3:00 neu 3:20)

a) Trefniadau Tywydd Sych

Gweithredir y goruchwyllo drwy system rota dyddiol. Bydd y staff ar ddyletswydd yn goruchwyllo'r buarth drwy gydol y cyfnod. Gwneir trefniadau i gyflenwi pan fo aelod o staff yn absennol.

b) Trefniadau Tywydd Garw

Ar gyfnodau o dywydd garw, yr athrawon dosbarth fydd yn gyfrifol am baratoi gweithgaredd i'r plant a'r staff ar ddyletswydd i'w goruchwyllo yn ystod yr egwyl.

c) Trefniadau Amser Cinio

Goruchwylir plant gan dair oruchwylwraig. Ar ôl i'r plant orffen bwyta, mae'r goruchwylwyr yn mynd allan gyda'r plant ac yn eu goruchwyllo ar y buarth hyd amser dod i mewn. Byddent yn cael eu cefnogi gan gymorthyddion y Cyfnod Sylfaen a chymorthyddion ADY. Yn ystod tywydd garw, byddant yn goruchwyllo'r plant yn eu dosbarthiadau.

CYSWLLT CARTREF / YSGOL

Anogir rhieni i gymryd diddordeb yn addysg eu plant gan hyrwyddo cydberthynas rhwng y cartref a'r ysgol. Trefnir cyfarfodydd rhieni yn dymhorol, a gwahoddir rhieni i'r amrywiol weithgareddau a drefnir gan yr ysgol. Gall rhiant drefnu cyfarfod ag athro penodol, drwy drefniant blaenorol.

Cyflwynir y Cytundeb Cartref Ysgol yn ystod y flwyddyn gyntaf o addysg statudol plentyn. Seilir y cytundeb ar bartneriaeth rhwng yr ysgol a'r rhieni er budd eu plant. Cyrchwch i wefan yr ysgol i weld copi o'r cytundeb.

GWISG YSGOL

Mae gan yr ysgol hon wisg ysgol swyddogol ac anogir chwi i ddilladu eich plant yn y canlynol:

- Crys polo melyn a logo'r ysgol wedi ei frodio arno.
- Crys chwys glas tywyll a logo cyffelyb ar hwnnw.
- Ffrog las gingham/trowsus tywyll.

Gellir prynu'r rhain mewn nifer o siopau yng Nghaernarfon neu drwy y Pwyllgor Rhieni ac Athrawon.

Pwysleisiaf nad oes gorfodaeth ar unrhyw ddisgybl i wisgo'r rhain er dyna yw dymuniad yr ysgol.

Serch hynny, disgwylir i'r plant fod wedi eu gwisgo'n lan a thrwsiadus, a bod y dillad yn rhai addas i'w gwisgo i ddibenion ysgol. Gwnewch yn siŵr bod enw eich plentyn ar bob un dilledyn os gwelwch yn dda. Mae'r bocs eiddo coll wedi ei leoli yng nghyntedd Cyfnod Allweddol 2.

Gofynnir i ddisgyblion â gwallt hir ei glymu, neu blethu.

TYNNU LLUNIAU

Yn achlysurol bydd lluniau yn cael eu tynnu o'r plant yn cymryd rhan mewn gweithgareddau gyda'r ysgol. Gall rhai o'r lluniau yma gael eu rhoi yn y papurau newydd, eu cynnwys mewn cyhoeddiadau neu ar safleoedd gwe'r ysgol, Cyngor Gwynedd neu sefydliadau eraill y byddwn yn cydweithio â nhw.

Os nad ydych am i'ch plentyn gael ei chynnwys/gynnwys mewn lluniau cyffelyb, a fyddech cystal ag ysgrifennu llythyr at y pennaeth i nodi hynny. Os na dderbynnir llythyr cymerir yn ganiataol nad oes gennych wrthwynebiad.

ADDYSG RHYW A PHERTHNASOEDD

Cyflwynir addysg rhyw a pherthnasoedd fel rhan o addysg bersonol, gymdeithasol a moesol y plentyn fel bod rhywioldeb yn cael ei adnabod fel priodwedd naturiol a chyffredin i bawb gan, ar yr un pryd, sylweddoli bod iddo oblygiadau personol, cymdeithasol a moesol. Mae addysg rhyw hefyd yn rhan o'r cwricwlwm Gwyddoniaeth.

Fe ymdrinnir â'r maes mewn ffordd sensitif a synhwyrol. Mae gan rieni hawl i eithrio eu plant o wersi addysg rhyw ffurfiol a gwneir pob ymdrech rhesymol i barchu'r hawl hwnnw. Am wybodaeth bellach dylid cysylltu â'r Pennaeth. Gellir gweld copi o'r Polisi yn yr ysgol.

ADDYSG GORFFOROL

Mae'r ysgol mewn partneriaeth â'r cartref, yn gyfrifol am ddatblygiad corfforol pob plentyn, yn ogystal â'i ddatblygiad addysgol a moesol. Felly, cynhelir gwersi Addysg Gorfforol yn rheolaidd i'r Cyfnod Sylfaen a'r Adran Iau yn neuadd yr ysgol, ar y buarth neu ar y cae. Bydd plant yr Adran Iau yn manteisio ar gyfnod o nofio yn ogystal yn ystod y flwyddyn.

Ein nod yw datblygu cryfder, rheolaeth ac esthetrwydd y plant trwy eu cael i fod yn gorfforol weithgar. Byddant hefyd yn cael cyfleoedd i weithio'n annibynnol a chyd-weithio ag eraill ac i lunio a rheoli gemau eu hunain.

Yn ddibynnol ar y wers, disgwylir i'r plant wisgo dillad priodol. Golyga hyn newid o'i gwisg ysgol i drowsus cwta a chrys T ar gyfer y gampfa. Mae trowsus loncian, crys T, crys chwys, treinars neu stÿds yn addas ar gyfer gwersi tu allan. Os yw plentyn yn anghofio ei ddillad addysg gorfforol disgwylir iddo/iddi ddefnyddio dillad sbâr o'r ysgol. Gwnewch yn siŵr fod enw eich plentyn ar bob dilledyn os gwelwch yn dda. Ni chaniateir gwisgo modrwyau, clustdlysau nag oriawr mewn unrhyw wers Addysg Gorfforol.

Mae Addysg Gorfforol yn rhan bwysig o'r Cwricwlwm ac yn statudol i bob plentyn. Os oes unrhyw reswm meddygol pam na all plentyn gymryd rhan mewn gwersi Addysg Gorfforol, gofynnir yn garedig i'r rhieni hysbysu'r ysgol yn ysgrifenedig. Hysbysir pob disgybl ar ddechrau'r flwyddyn ar ba ddiwrnod y caiff gwersi Addysg Gorfforol.

Cefnogir cystadlaethau dalgyloch a sirol pêl-droed, pêl-rwyd, rygbi, athletau a chyfeiriannu. Yn ogystal cynhelir mabolgampau ysgol yn flynyddol. Cynhelir sawl Gala Nofio yn ystod y flwyddyn.

Caiff pob disgybl yn Cyfnod Allweddol 2 gyfle yn ystod y flwyddyn addysgol i gyfres o wersi nofio, yng Nghanolfan Hamdden Arfon. Fe'ch hysbysir mewn da bryd pan fydd eich plentyn yn mynychu. Mae'r gwersi'n rhan o weithgareddau'r ysgol, ac fe ddisgwylir i bob disgybl fynychu'r gwersi. Gofynnir i'r rhieni hysbysu'r athro dosbarth drwy lythyr, os na fydd eu plentyn yn mynychu. Gofynnir yn garedig i'r rhieni gyfrannu £1 tuag at gost cludiant.

ADDYSG GREFYDDOL

Nid oes gan yr ysgol gysylltiadau uniongyrchol na ffurfiol ag unrhyw enwad crefyddol penodol, ond gwahoddir y gweinidogion ac offeiriaid lleol i'r ysgol yn ysbeidiol i arwain addoli ar y cyd. Ceir cyfnod o addoli ar y cyd yn ddyddiol; ar lefel adran neu ysgol gyfan ar bob dydd Llun a Gwener ac yn y dosbarthiadau ar ddyddiau eraill. Y ffydd Gristnogol a gyflwynir yn bennaf yn yr addoli hwn a chaiff disgyblion gyfle i gymryd rhan yn rheolaidd.

Mae gan rieni hawl i ofyn i'r ysgol eithrio eu plant o wersi addysg grefyddol a chyfnodau o addoli ar y cyd. Dylai rhieni sy'n dymuno gwneud hynny ddod i drafod y mater gyda'r Pennaeth.

GWAITH CARTREF

Darllen

Gweithredir cynllun darllen Cartref/Ysgol o Blwyddyn 1 - Blwyddyn 6. Bwriad y cynllun yw hyrwyddo partneriaeth rhwng rhieni a'u plant a disgybl a'u hathrawon. Gwerthfawrognw eich cydweithrediad i hybu darllen yn gyffredinol er budd eich plant. A fydddech gystal â sicrhau fod eich plant yn dychwelyd y llyfrau a ddarllenwyd yn wythnosol ynghyd â'r llyfr coch cofnod darllen. Gofynnir i chi roi sylwadau yn y llyfr a'i lofnodi.

Gwaith Cartref

Yn achlysurol rhoddir gwaith cartref yn y Cyfnod Sylfaen. Gosodir gwaith cartref yn Cyfnod Allweddol 2 yn wythnosol. Gobeithir y byddwch fel rhieni yn cydweithredu i hybu gwaith cartref y plant. Yn dilyn ymgynghoriad gyda rhieni, mae'r ysgol yn gosod tasgau amrywiol er mwyn apelio at ddant pob plentyn.

Ambell i dro bydd gweithgarwch arbennig yn gofyn am wybodaeth gan rieni, perthnasau a chymdogion, neu'n gofyn am waith holi a darganfod ar ran y plant. Sylweddolir mai cyfrifoldeb y cartref yw'r plentyn yn ystod yr oriau hyn ac mai yng ngoleuni'r cyfrifoldeb hwnnw y bydd rhieni yn cytuno neu'n anghytuno i gydweithredu.

O dro i dro fe all athro/athrawes ofyn i blentyn wneud gwaith ychwanegol er mwyn cryfhau rhyw faes neu ganolbwyntio ar agwedd arbennig o'r gwaith. Bryd hynny, gobeithir cael cydweithrediad y cartref ac anogaeth i'r plentyn i wneud y gwaith.

CODI TÂL AM WEITHGAREDDAU

Mae'r Corff Llywodraethol, yn unol â gofynion Deddf Addysg 1988, yn derbyn na ellir codi tâl am y canlynol:

- mynediad i'r ysgol
- yr addysg a roddir yn ystod oriau'r ysgol
- defnyddiau ac offer ar gyfer gwersi yn ystod oriau ysgol
- gweithgareddau a gynhelir yn ystod oriau ysgol

Rhagwelir y trefnir rhai teithiau yn ystod oriau ysgol na fydd yn rhan hanfodol o'r gwaith cwrs, ond a fydd yn brofiad llesol i'r disgyblion. Yn ôl y Ddeddf, er nad oes gan ysgol hawl i godi tâl am deithiau o'r fath, mae ganddi hawl i:

- ofyn am gyfraniad gwirfoddol tuag at gost o drefnu'r fath daith
- ofyn i asiant allanol i drefnu'r daith

Heb gyfraniadau tebyg, mae'n bosibl na fydd y gweithgaredd yn cael ei gynnal. Mae hawl gan y Pennaeth i ddileu gweithgaredd a drefnwyd os yw cyfraniadau isel yn golygu colled sylweddol i'r ysgol.

Awdurdodir y Pennaeth i ofyn am daliadau ar gyfer y canlynol:

- gwersi cerdd unigol
- gweithgareddau a gynhelir y tu allan i oriau'r ysgol yn ôl amodau'r Ddeddf
- mewn achosion lle achosir difrod i unrhyw ran o adeiladau'r ysgol yn dilyn ymddygiad disgyblion
- pan fydd disgybl yn colli neu'n difrodi llyfr, cyfarpar neu eiddo sy'n perthyn i'r ysgol, i aelod o staff neu ddisgybl arall

GWEITHGAREDDAU ALLGYRSIOL

Mae'r ysgol yn credu'n gryf mewn meithrin a datblygu doniau creadigol ac fe hyrwyddir hyn drwy gynnal cyngherddau a chystadlu mewn Eisteddfodau. Bydd yr ysgol bob amser yn gwneud ei gorau i gefnogi gweithgareddau lleol o'r fath.

Ceir hefyd gyfleoedd i gystadlu mewn gweithgareddau addysg gorfforol -yn aml maent ar benwythnos neu gyda'r nos. Mae'r gweithgareddau hyn yn agored i'r holl ddisgyblion sydd ym marn y Pennaeth, yn aeddfed ac yn barod i gymryd rhan gyfrifol ynddynt.

CYNGOR YSGOL

Mae Cyngor Ysgol, Bontnewydd yn weithredol ers rhai blynnyddoedd bellach ac yn dylanwadu'n positif iawn ar fywyd pob dydd yr ysgol. Mae gan ddisbarthiadau blynnyddoedd 2 i 6 Gyngor Dosbarth, ac yn ystod y flwyddyn cynhelir sawl cyfarfod ble caiff y disgyblion oll gyfle i fynegi barn am weithdrefnau'r ysgol a chynnig syniadau ar gyfer gwella.

Ar ddechrau pob blwyddyn ysgol cynhelir pleidlais cudd ble mae pob Cyngor Dosbarth yn ethol dau ddisgybl i'w cynrychioli ar y Cyngor Ysgol.

Mae'r Cynghorau Dosbarth ac Ysgol yn rhoi cyfle i'r disgyblion fynegi barn a chydweithio mewn partneriaeth gyda Staff a Llywodraethwyr i wella a datblygu'r ysgol er lles pawb. Mae hefyd yn rhoi cyfle i'r disgyblion ddatblygu sgiliau di-ri gan gynnwys cyfathrebu, gwranddo, mynegi barn, datrys problemau, gwneud penderfyniadau a myfyrio. Gan eu bod hefyd yn cael dyraniad arian, cadw cofnodion a llunio mantolen maent hefyd yn datblygu eu sgiliau rhifedd a TGCh.

CYNGOR ECO

Mae Ysgol Bontnewydd yn 'Ysgol Werdd' ac wedi bod yn rhan o'r Cynllun 'Eco-Sgolion' ers Mai 2009 a Chynllun 'Ysgolion Gwyrdd' ers Medi 2010. 'Rydym yn ymfalchïo yn y ffaith ein bod yn cydweithio fel tîm i godi ymwybyddiaeth o'r angen i ofalu am yr amgylchedd a chymryd camau gweithredol er mwyn ei ddatblygu. Mae'r Cyngor Eco/Gwyrdd yn cael dylanwad positif iawn ar yr ysgol ac yn sicrhau ein bod yn gweithredu'n gyfrifol er lles yr amgylchfyd.



YSGOL IACH

Mae Ysgol Bontnewydd yn rhan o gynllun Ysgolion Iach Gwynedd. Rydym yn annog disgyblion i fwyta'n iach a chadw'n heini.

CLYBIAU AR ÔL YSGOL

Cynhelir clybiau amrywiol yn ystod y flwyddyn rhwng 3:20pm a 4:30pm. Mae'r clybiau yn agored i ddisgyblion blynyddoedd 4 – 6. Anfonir rhaglen digwyddiadau at rieni ar ddechrau pob tymor yn nodi'r gweithgareddau a'r dyddiadau perthnasol. Gweler adran Newyddion y wefan am restr o ddyddiadau a gweithgareddau.

Petai'r athrawon / hyfforddwyr yn methu bod yn bresennol a bod angen gohirio'r gweithgaredd, hysbysir y plant / rhieni cyn gynted â phosibl.

Clwb Campau'r Ddraig

Cynhelir clwb chwaraeon yn bythefnosol drwy gydol y flwyddyn. Bydd y gweithgareddau yn cynnwys gemau, athletau a sesiynau ffirwydd.



Clwb Garddio

Cynhelir clwb garddio yn ystod tymor y tymor plannu, tyfu a chynaeafu. Bydd y gweithgareddau yn cynnwys plannu bylbiau, hadau a phlanhigion, chwynnu a gofalu am yr amgylchedd.

Clwb Celf

Cynhelir clwb celf yn ystod tymor y gaeaf. Bydd y gweithgareddau yn cynnwys dysgu sgiliau megis gwnïo, gwau, gwehyddu a ffeltio.



YR URDD

Mae gweithgareddau'r Urdd yn flaenllaw ym mywyd yr ysgol a rhoddir cyfle yn flynyddol i aelodau gymryd rhan mewn amryw gystadlaethau boed mewn Eisteddfodau neu gystadlaethau Celf.

Bydd disgyblion Cyfnod Allweddol 2 yn cymryd rhan yng nghystadlaethau chwaraeon yr Urdd megis pêl-droed, rygbi, pêl-rwyd, nofio, gymnasteg ac athletau.

Bydd disgyblion blwyddyn 6 yn mynychu Gwersyll yr Urdd Glanllyn pob mis Medi.

Am yn ail flwyddyn bydd disgyblion blynyddoedd 5 a 6 yn aros yng Nghanolfan yr Urdd, Caerdydd wrth ymweld â'r brifddinas.

ADRAN YR URDD

Cynhelir adran yr Urdd yn y Ganolfan, Bontnewydd ar gyfer disgyblion blynyddoedd 2 – 6. Ar hyn o bryd mae'r Adran yn cyfarfod unwaith bob hanner tymor rhwng 3:30 – 4:30.

Rhieni sydd yn gyfrifol am drefnu gweithgareddau'r.

Cysylltwch os ydych ar gael i gynorthwyo gyda'r adran.



CYMDEITHAS RHIENI ATHRAWON

Mae cangen gref iawn o Gymdeithas Rhieni ac Athrawon yn bodoli yn yr ysgol, sy'n cynnwys cynrychiolwyr o rieni gweithgar a brwdfrydig. Mae'r gymdeithas bob amser yn awyddus i groesawu aelodau newydd ac yn ddiolchgar iawn o bob cymorth a gynigir.

Cynhelir amrywiol weithgareddau i godi arian tuag at goffrau'r ysgol yn ystod y flwyddyn ac rydym yn gwerthfawrogi'n fawr yr holl gefnogaeth mae'r ysgol yn ei dderbyn gan y gymdeithas hon.

Cynhelir cyfarfod blynyddol ar ddechrau'r flwyddyn ysgol i godi aelodau newydd ar y pwyllgor, ac i ddechrau trefnu gweithgareddau am y flwyddyn ddilynol. Fel rheol cynhelir tua dau weithgaredd bob tymor ysgol.

GWIRFODDOLI

Rydym yn croesawu rhieni a pherthnasau i wirfoddoli mewn tasgau amrywiol. Cysylltwch os ydych ar gael i fod yn gefnogwr darllen neu i gynorthwyo yn y Clybiau.

Yn ychwanegol, gellid cofnodi eich enw i fod yn ran o'r criw 'Dwylo Prysur' sy'n cynorthwyo gyda peintio a man dasgau eraill.

Y DREFN GWYNO

Mae'r Corff Llywodraethol wedi mabwysiadu polisi ynglŷn â'r drefn i'w dilyn pan dderbynnir cwynion yn gysylltiedig â'r ysgol. Ym mhob achos dylid cysylltu â'r ysgol i wneud apwyntiad i drafod unrhyw gŵyn gyda'r Pennaeth yn y lle cyntaf, neu gysylltu â Chadeirydd y Llywodraethwyr os yw'r gŵyn am y Pennaeth.

Pwysleisir, y gellir ymdrin â llawer o gwynion yn gyflym ac effeithiol drwy ystyriaeth anffurfiol yn seiliedig ar drafodaethau gyda'r Pennaeth. Hwn yw'r cam rhesymol cyntaf, a bydd y Corff Llywodraethu'n disgwyl bod y cam yma wedi ei gyflawni cyn cyflwyno'r gŵyn yn ffurfiol mewn achosion eithriadol. Os nad ydych yn fodlon yn dilyn trafodaeth â'r Pennaeth a chyfnod rhesymol i ddelio a'r anghydfod, yna cynghorir chwi i gysylltu â Chadeirydd y Corff Llywodraethol.


GWYBODAETH BELLACH

Am wybodaeth bellach gallwch gyrchu i wefan yr ysgol ar <http://www.ysgolbontnewydd.org> neu drwy gysylltu â'r Pennaeth.


TAFLEN SYLWADAU RHIENI

Gobeithio fod y wybodaeth o fewn y llawlyfr wedi bod o gymorth i chi.

Byddem yn falch o glywed os oes gennych unrhyw sylwadau am y cynnwys, nodwch hwy isod os gwelwch yn dda a dychwelwch y daflen hon i'r ysgol



Efallai bod gennych awgrymiadau pellach ar gyfer y llawlyfr a fyddai'n ein cynorthwyo ar gyfer y fersiwn nesaf. Os oes, mae croeso i chwi eu nodi isod:



Diolch yn fawr
Janet Wyn George (Pennaeth)

